

日物土貢者各因其土所生之物而貢
之也制外內謂五服之差遠近異制
或脩刑政或昭

文德遠近之執異也是以春秋內諸夏而外夷狄師古曰春

秋成十五年諸侯會吳於鍾離公羊傳曰曷為殊會吳外也曷為外春秋內中國而外諸夏內諸夏而外夷狄

也夷狄之人貪而好利被髮左衽人面獸心其與中國

殊章服異習俗飲食不同言語不通辟居北垂塞露之

野師古曰辟讀曰僻逐草隨畜射獵為生隔以山谷雍以沙幕

師古曰雍讀曰壅天地所以絕外內也是故聖王禽獸畜之不

與約誓不就攻伐約之則費賂而見欺攻之則勞師而

招寇其地不可耕而食也其民不可臣而畜也是以外

而不內疎而不戚師古曰戚近也政教不及其人正朔不加其